

Uunga siunnersuut: Qalerallit sinerissap qanittuani pisarineqarsimasut ”Japan cut” atorlugu suliareqqaarneqarsimannikkaangata akitsuuserneqartalernissaanut Naalakkersuisut UPA-14-mut inatsisissamik siunnersuusioqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Jens Immanuelson, Siumut)

Akissuteqaat

(Aningaasaqarnermut Nunamullu Namminermet Naalakkersuisoq)

Siullermeerneqarnera

Inatsisartunut ilaasortaq Jens Immanuelson qutsavigaara, qaleralinnit pisuussutitsinnik inuiaqatigiit-tut qanoq iluaquteqarnerusinnaanerput pillugu oqallinnissamik pisariaqartumik saqqummiussimmat.

Tassuunakkut oqaluuserisassanngortinneqarput aalisarneq pillugu politikkitsinni, suliffissaqartitsi-niarneq pillugu politikkitsinni, inuussutissarsiutit pillugit politikkitsinni akileraartarnerlu pillugu po-litikkitsinni apeqqutit angisuut pingaarutilillu.

Qalerallit nunatsinni suliarineqaaqartartut amerlanerulernissaat aalajangiiffigisassatut siunnersuu-tikkut ugguuna aqqutissiuunniarneqartoq Naalakkersuisut tunngavigaat. Taamaassappat soorlu qale-rallit nerpiisa aamma akitsuuserneqannginnissaat pissusissamisuuksaaq.

Atuisartut ilaasa qalerallit suliarineqanngitsut, tassa imaappoq qalerallit erlaviiginnakkat pisiariu-manerusarpaat. Qalerallit taamaattut akitsuuteqalerpata tamanna selskabit iluanaarutigisagaasa ikin-nerulernerannik imaluunniit qalerallit tunineqartartut ikinnerulernerannik kinguneqassaaq.

Tunisassiornermi aningaasartuutit qaffakkaangata selskabit sipaarniarfissarsiulersarput. Aamma akitsuutinik atuutilersitsisoqartillugu taamaappoq. Assersuutigalugu maskiinat amerlanerujartuin-nartut aalisakkanik suliffissuarni sulisunut taarsiullugit atugaapput. Sipaarniarfigisinnaasaat alla tas-saavoq tunisassiassanik pilersuisuusut, tassa aalisartut, aalisagaatiminnik tunisinerminni akikinneru-sitsinissaannik pinngitsaaliipajaarniarnissaq.

Maannakkut paasissutissaatigineqartut akitsuutinik qaffaanissap qanoq kinguneqarsinnaanerannik na-liliinissamut tunngavigissallugit naammangillat. Akitsuutip ilaa qanoq angitigisoq aalisartut appa-sinnerusumik akeqartitsinermikkut akilertussanngussavaat, maskiinanik atuinerulernikkut sipaarfiu-sinnaasut suuppat aammalu akitsuutip ilaa qanoq angitigisoq piginnittut iluanaarutigisagaasa ikili-nerisigut matussuserneqassava.

Nunatsinni suliffissaaleqineq sapinngisamik piaarnerpaamik annikillisinneqassappat pimoorussamik suliniuteqartoqarnissaa Naalakkersuisut isumaqatigaat. Qalerallit aalisakkallu allat amerlanerusut nunami maani suliareqqaarneqartalersinnaappata, tamanna ilorraap tungaanut aallariarnerussaaq pi-ngaarutilik.

Siunissami aalisarneq inuussutissarsiornerlu pillugit politikkiisaaq, suliffissaqartitsiniarneq pillugu politikkiisaaq aalisarnerullu iluani akileraartarnikkut politikkiisaaq Naalakkersuisut ukiumi aggersu-mi aalajangiiffigisussaavaat. Inuiaqatigiit aalisakkanit pisuussutitigut iluanaarutigisinnaasaat tamar-

miusoq sapinngisamik anginerpaajussappat tamakku pillugit politikkit imminnut ataqatigiinnerisa pitsannorsarneqarnissaat pingaaruteqarluinnarpoq.

Qaleralinnit nioqqutissiat ilaasa allanit allaanerusumik akitsuusersorneqarnissaannik aalajangiipallannissamut taarsiullugu Naalakkersuisut siunnersuutigaat Jens Immanuelsep siunnersuutaa, aali-sarnerup iluani pisuussutinik akileraarusersuinissap tamarmiusup qanoq aqqissuussaanissaa pillugu oqaluuserisanut aallartereersunut ilanngunneqassasoq. Pisuussutinik akileraarusersuinissamut tunngatillugu siunnersuummik 2014-imi saqqummiussisoqarnissaa Naalakkersuisut naatsorsuutigaat, Jens Immanuelsepillu siunnersuutaa taamaalilluni isummersornissami ilanngunneqassalluni.

Naalakkersuisut taamatut oqaaseqarlutik immikkoortup suliarineqarnerata ingerlaqqinnissaanut qilanaarput.